

DE COMPASSIONE BEATAE MARIAE

Stabat mater dolorosa
juxta crucem lacrimosa
 dum pendebat Filius,
cuius animam gementem,
contristantem et dolentem
 pertransivit gladius.

O quam tristis et afflicta
fuit illa benedicta
 mater Unigeniti,
quae moerebat et dolebat
et tremebat, dum videbat
 nati poenas incliti.

Quis est homo, qui non fleret
matrem Christi si videret
 in tanto supplicio?
Quis non posset contristari,
piam matrem contemplari
 dolentem cum filio?

Pro peccatis suae gentis
vidit Iesum in tormentis
 et flagellis subditum;
vidit suum dulcem natum
morientem, desolatum,
 dum emisit spiritum.

Pia mater, fons amoris
me sentire vim doloris
 fac, ut tecum lugeam;
fac, ut ardeat cor meum
in amando Christum Deum,
 ut sibi complaceam.

Sancta mater, istud agas,
crucifixi fige plagas
 cordi meo valide,
tui nati vulnerati,
tam dignati pro me pati
 poenas mecum divide!

Fac me vere tecum flere,
crucifixo condolere,
 donec ego vixero;
juxta crucem tecum stare
et me tibi sociare
 in planctu desidero.

Virgo virginum praeclara,
mihi iam non sis amara,
 fac me tecum plangere,
fac, ut portem Christi mortem,
passionis eius sortem
 et plagas recolere.

Fac me plagis vulnerari
cruce fac inebriari
 ob amorem filii;
inflammatum et accensus
per te, virgo, sim defensus
 in die iudicii.

Fac me cruce custodiri,
morte Christi praemuniri,
 confoveri gratia.
Quando corpus morietur
fac, ut animae donetur
 paradisi gloria.

VERBUM BONUM ET SUAVE

1. Verbum bonum et suave,
personemus illud „Ave“,
per quod Christi fit conclave,
virgo, mater, filia;
2. per quod „Ave“ salutata
mox concepit fecundata
virgo, David stirpe nata,
inter spinas lilia,
3. ave, veri Salomonis
mater, vellus Gedeonis,
cuius magi tribus donis
laudant puerperium,
4. ave, solem genuisti,
ave, prolem protulisti, ave,
mundo lapso contulisti
vitam et imperium,
5. ave, mater Verbi summi,
maris portus, signum domi,
aromatum virga fumi.
angelorum domina;
6. supplicamus, nos emenda,
emendatos nos commenda
tuo nato ad habenda
sempiterna gaudia.

VINUM BONUM ET SUAVE

1. Vinum bonum et suave,
bonis bonum, pravis prave,
cunctis dulcis sapor, ave,
mundana laetitia.
2. Ave, felix creatura,
quam produxit vitis pura,
omnis mensa fit segura
in tua praesentia.
3. Ave, color vini clari,
ave, sapor sine pari,
tua nos inebriari
digneris potentia.
4. Ave, placens in colore,
fragrans in odore,
ave, sapidum in ore,
dulce linguae vinculum.
5. Ave, sospes in molestis,
in gulosis mala pestis.
Post amissionem vestis
sequitur patibulum.
6. Monachorum grex devotus,
omnis ordo, mundus totus
bibunt adaequales potus
et nunc et in saeculum.